

La tschinquina

Ün gö da cartas tradiziunal

Cuort'introducziun in ün gö tradiziunal da l'Engiadina



Daspö cura chi's giova quist gö nu'm sa da dir ingün. D'ingionder ch'el vain n'eir na. Dir dischna cha quai as giovaiva fingià adüna quia a Guarda, pero eir a Lavin, ad Ardez ed a Susch. Varamaing as cugnuoscha la tschinquina in bod tuot l'Engiadina, pero eir our il Partens. Plücofacil sarà rivà quist gö sü da l'Italia, simil sco'l gö da la Murra ed ils sgrafitts.

In mincha cumün gniva giovà üna pa auter la tschinquina. Ils

ultims ons s'han avischinadas las reglas cumünalas da la Tschinquina e fuormadas reglas per gronda part unifichadas, usche esa plü simpel da giovar cun personas d'ün auter cumün. Quist svilup as poja ingrazchar al fat allegraivel chi da vi e plü turniers e maistrainzas regiunalas pero eir ad ün fat main allegraivel. I da vi e main giovaders i'ls cumüns, usche chi's es sforzà da giovar cun da quels d'auters cumüns.

Clomar schon, ma na bragir

La Tschinquina n'haja imprais a cugnuoscher magari tard cun 16 ons i'lla Crusch Alba vi Guarda.

Ils vegls giovaivan a chartas, ils giuvens s'inscuntraivan quà per ir our d'cumün in sortida.

Tschinquina d'eira ün gö per vegls. Fin ch'ün bel di sun eir eu restà in cumün e nu sun i a la disco giò Scuol, aint in Samignun, our il Reschen o dafatta giò Prat.

Il gö paraiva interessant pero magari cumplichà. I nu d'eira ne Jass ni Bandur. I d'eira la Tschinquina.

Pervi chi douvra tschinch per giovar e cha'ls indigens cun üna tschert'età d'eiran rars in ustaria n'haja imprais bainbod, insembel cun ün per auters giuvens, a giovar la tschinquina.

Armon Schlegel



CUORTA DESCRIPZIUN

La tschinquina es ün gö da cartas, cartas francesas ed i's giova in tschinch. Da quai gnirà plücofacil eir il nom tschinquina. Il gö ha 40 cartas, mincha culur ha 10. Varaming giova mincha giovader dapersai. El guarda da gudognar usche blers raps sco pussibel. I va per bler raps. Pro mincha gö as poja perder o gudognar tschinch fin 20 raps. In üna sair'intera as poja perder ün



fin maximalmaing duos francs, Malgrà chi nu va per gronds imports sun las emozions per tant plü grondas.

Eir scha minchün giova per sai d'ürant tuot la saira, giova minchün insembel cun inchün auter e quai pro mincha gö cun inchün auter. Cun chi ch'ün giova dependa da sias chartas e da che chi s'ha colmà. Minchatant as cloma il faus e lura vegna bragi.

REGLAS

Quantità da giovaders:

5

Cartas:

Gö frances cun 40 cartas. 3-2-
ass-rai-raïna-paur-7-6-5-4

Valur da las cartas:

3=1, 2=1, ass=3, rai=1, raïna=1,
paur=1, il reist=0, l'ultim püt=3

Böt dal gö:

Improvar da far ils plü bliers puncts pussibel cun metter illa runda la carta la plü auta. I nu quintan pero ils püts dimpersè la quantità da puncts.

Cumanzamaint dal gö:

La tschinquina vain giovada in direcziun dal schleppun, vould dir a dretta.

Ûn maisda, quel a schnestra d'el sto dauzar giò il plic. Mincha giovader survain ot cartas quai in duos jadas quatter.

Il giovader a dretta da quel chid ha scumparti las cartas cumainza a clomar. Quai vould dir ch'el po dir che giovader che'l vess gugent sco soci. Quel giavüsch po'l exprimer cun giavüschar üna charta. Il giovader cun la carta giavüschada giova quist gö insembel cun quel chi ha clomà.

Il prüm giovader ha pero eir la pussibilità da passar scha sias cartas nu til persvaden. El po pero eir dir eventual. Quai vould dir ch'el cloma, pero be sch'ingün auter nun es pront da clomar.

Nu cloma il prüm giovader ingüna carta vain il seguond giovader landervia. Nu cloma n'eir quel nöglia vain il terz ed usche inavant. Nu cloma ingün nöglia daja il „chi fa meno“.



Pussibilitats da clomar:

Suvent vain clomà ün traier o ün duer concret. Per exaimpel il duer da cour.

I's po clomar eir simplamaing il prüm duer, traier o ün'otra carta. Quel giovader chi metta d'ürant quist gö la prüma carta da quai chid es gnü clomà es insembel cun quel chid ha clomà.

I's po eir clomar üna miseria. Quai vould dir cha quel chi cloma nu fetscha ingüns püts in quist gö. Quel chi cloma giova in quel cas sulet cunter tschels quatter.

Quia daja duos variantas. La miseria averta e la serrada. Pro l'averta metta il giovader chi ha clomà sias cartas per tuots visiblas sün maisa per giovar. Pro la serrada restan sias cartas zoppadas.

Successiun dal clomar:

miseria averta
clomar üna carta
eventual
miseria serrada
chi fa meno

Quai vould dir cha sch'ingün illa runda nu fà üna miseria averta ha minchün in davoruoda la pussibilità da clomar üna carta o da dir „eventual“. Il prüm chi cloma vala. Nu cloma ingün sto clomar quel chi ha dit avant „eventual“. Nu n'ha dit ingün eventual ne fatta üna miseria serrada vain giovà „chi fa meno“.

„Chi fa meno“ vould dir cha tuots provan da far usche pacs puncts sco pussibel. Riva pero ün da far tuot ils püts ha el gudognà e survain da minchün 10 raps. Han duos o trais listess bliers puncts vain tratta üna carta, la carta auta ha pers.

pajar

Chi chi perda paja. Normalmaing nu's perda sulet dimpersè in duos o in trais.

Quel chi ha clomà paja il dubel da seis soci. Ûn paja 10 raps e tschel 5. Tschels trais survegnan minchün 5 raps.

Pro la miseria averta as poja perder o gudognar 20 raps.

Pro ün matsch vala il dubel. Quel chi ha clomà gudogna o perda 20 raps, seis soci 10 raps.



tips e trics

DOMBRAR IL PUNCTS

Il total dals puncts es 35. Il team chi ha sur 17 puncts ha gudagnà. Na invlidar da dombrar l'ultim püt=3!

SEGNS

Varamaing nu's das-chessa tradir alch dal gö cun discuorer. Segns sun pero permiss, pero be ils duos seguaints. Cloccar e struschar.

Quel chi ha clomà, e be quel, das-cha dar ün cloc o üna struschada cun la carta sün maisa cur ch'el tilla metta. Cloccar vould dir da tour cun quella carta chid es gnüda clomada, far püts e turonar culla culur actuala. Struschar vould dir da laschar, ch'el tuorna darcheu cun quella culur.

Vegn tut il prüm püt cun ün traier po gnir dit famiglia. quai vould dir chi nu s'ha la carta clomada.

LAS CULURS

Las culurs han nom crusch, cour, badigls/pala, coppas/pizza.